

Mekana ε Pɔl, pε daa bot ε ghaada Kolɔs Eniel

Ghaada Kolɔs ε ghaada di pε esila dwooo kyee dik Azi Minεed, di edjooaa mos Tuulki'ak. Deenek, Pɔl nabe ε aakebee bot ε zεega mendjaala ghaada yenek. Mot nakus ye ɔ, ye nabe ε Epafalas, ngɔt tɔ sama bɔn nyεeg be ne be nɔɔ di sa mεsa ɔ (1.7; 4.12).

Pɔl nagwak nάά, bot ε epekɔɔ ekeletye tɔ ndjaa Zεeb ghaada yenek. E sok bot binɔk nadi elyo bot ε, ye nabe ε aadi tyee wat ne melyo mε Mbεε Bhaadal ee bot ε lwoma nalyo ε mεken ε. Be epelee ne bot ε ghaada Kolɔs nάά, be du metinj mɔɔ namwa, ne baasa nάά, be djaala ne membi mεbwala di kɔ εko ε bɔs ε. Pɔl ε membok, nyε tok ne ghwyil εte ko. Nyε bookwyal mεkana ne bot ε Kolɔs.

Mekana menek ne bot ε Kolɔs ε, Pɔl nadi elyaal bot «mot Klisto di ε!» Ye kwyel ε lee nάά, mot Zεeb nazesεε ne elwom εtep εtsik ε bot ɔ. Pε Kolɔs bot ne gwak bwooo ne esa e mεbwala be di aabee ε, ee di nάά, ye ε ne ghwyil mεbwala di kɔ bɔs ε. Ghuna, *Klisto ne bwala dhaa nwyak tak*. Eghen Yezu Klisto nagwyε kɔ melaaba ε, nyε naasa nάά, eghwyil e mεbwala di kɔ bɔs ε, lik ne syen. Eghen nyε nadje tsik ne mɔn'ε Klisto, Zεeb naadis eghwyil mεbwala djas di kɔ bɔs ε. Ye ε etεp tak ε Zεeb nasa nάά, Klisto di lo mεsɔ mε zεega ndjaa mendjaala. Zεega ndjaa mendjaala ε dάa nyel ε Klisto, da ekyes ε kadi ε ekeletye zεega tak. Ye ε nyεy ε di Kukuma e bot djas zedum konj ne Zεeb ɔ, ye kwyel elεε ε mot di edje bot

tsik na bes tɔ ɛgwakel nɛ Zɛɛb. Tin, tɔ ɛduwa Zɛɛb ɛ ɔɔ, bot ɛ zedum kon nɛ Zɛɛb bɛ eebela di tɔ ɛsyee nɛ ɛgom ɛ Klisto. Deenek, bɛ moo ɛ bot ɛ na bes.

Tɔ pes mɛkɛn e mɛkana mak, ɛlanɛl 1.1–2.5, bi ɛ waabee dhiiti djeeb di eduwal *Klisto dɔɔ Gheɲ bhwak* nɛ yii zɛɛga ndjaa mendjaala. Bi ɛ baabee tɔ ɛlanɛl 1.15-20. Ɛsok nɛ bot neebela djeeb yenek, ye ɛ nɛ mendjaala dum nɛ bot ɛ ghaada Kolós. Bi ɛ aabela ye ɛ tɔ ɛlanɛl 1.3-14. Bhis djeeb tak, Pɔl ɛpebaɲa mɛsa mɛ dum nɛ zɛɛga ndjaa mendjaala. Bi ɛ aabela ye ɛ tɔ ɛlanɛl 1.24–2.5.

Bhis tak, mot nakwyal mɛkana ɔ, ɛpelɛɛ nɛ ekeletyɛ Kolós náá, bɛ ɛ kobaka, 2.6-23. Sa bɛ ààgwak bot ɛ di elyo bot embee mɛlyo ɔ. Bɛ goka ɛ nɛ ɛdi tɔ ɛdum ɛ kon nɛ Zɛɛb bɛ nabela ɛ.

Ɛtɛp ɛsilal, mɛkana ɛpedjɛ mɛlyo ɛtɛp mot needi nɛ mbɛɛ mɛfulu tɔ zɛɛga bot, tɔ mɛbyel, dɔɔ nɛ kɔ ɛko ɛ bɔs, 3.1–4.6.

Mɛkana tak kɛsik ɛ nɛ bɛmɛswosel (4.7-18).

Mɛkpa mɛ di tɔ mɛkana kakyeeda nɛ bot ɛ ghaada Kolós ɛ, dinaa dɔɔ nɛ mos ɛ mɛtanɲ. Klisto eepɛk bot ɛ bɔs si ghwyil ɛ bot ɛ mɛbhuka. Nyɛ eebaapek bot ɛ zɛɛga ndjaa mendjaala nɛ sa nadi ebɛk bɛ ɛ, nɛ sa di esa náá, bɛ zyala ɛ.

Mɛswosel

¹ Ye ɛ mam Pɔl, mot-lwoma ɛ Yezu Klisto tɔ ɛkwosak ɛ Zɛɛb, nɛ mɔn ɛ nyɛɛg'ena Timote.

² Bis kwyal mɛkana mak ɛ, ɛtɛp bɔn Zɛɛb di pɛ tɔ ghaada Kolós ɔ, bɔn nyɛɛg bina bot ɛ di sosoob tɔ

εgwakel ne Klisto. Beta náá, Zεeb Σεεg'ena dje bin enem ne embεε ne egwyem.

Εbulal ε bhoo ne Zεeb

³ Melu djas bis ne bulal bhoo ne Zεeb, Σεεg ε Gheη'enaka Yezu Klisto, é sok bis di edjaala etep'en ε.

⁴ Etεε náá, bis naagwak bot elii kó esu ε edum ε kon ε len ne Yezu Klisto, zenoo kwyel bi di ne ye ne bot djas zedum kon ne Zεeb ε.

⁵ Bi sa deenek ε, etεε náá, bi é ne εbwaalel náá, bi é waabela sa Zεeb nazekoobal bin ye pe to gwoo ε. Eghen bi nagwak Mbεε Bhaadal, ee di mekpa me etsεtse ε, bi naagwak bot elii kó esu ε etep binek.

⁶ Mbεε Bhaadal tak naake kó εko ε bos djas. Mbεε Bhaadal tak nabe é, ye naakan εdje bhum edi djas. Ye é tyee wat dáa ye nasael pe yebó dwoo meken «too» ε. Ye nabe é, é sok be nagoola bin enem ne embεε e Zεeb ε. Tin, ye nabe é bi naagwak ne egu náá, ye é tseεtse náá, Zεeb epelyaal enem ne embεε be djas ne bot.

⁷ Ye é Epafalas, mon nyεεg'es bis di ekwyel o, mot bis ne be noo di esa mesa o, nyε é nadjε bin melyo menek. Nyε εpesa mesa étep'en dáa mot esosoob to mesa ε Klisto.

⁸ Nyε eesa náá, bis gu dáa Sisim na Dεε di esa náá, bis kwyel bon besó bina to edum ε kon ne Zεeb.

⁹ Ye é étep tak ε bis di áakat edjaala etep'en, kana elu ε bis nagwak tep'en eliaa ε. Bis epedjaala ne Zεeb náá, nyε lyaal bin ekwosak ε le enyope, kó esu etson ne metselal me Sisim'ε di edje ε.

¹⁰ Bis djaala Zεeb ε etεε náá, bi neeke dáa nyε di ekwyel ε, ne esesa mesa dáa nyε di ekwyel ε. Nyε

waamyala ne enem esa djas ee bi aadi esesa ε.
Deenek, bi é waató sok tó egu etep Zεeb enyɔɔpe.

¹¹ Bis é epebaadjaala ne Zεeb náá, ne ghwyil'e di
ààbe ne esik ε, nye dje bin meghaaz étɛp bi needjisa
etɛp djas ne emaad é lyem. Ne memyaala djas,

¹² bulalka bhɔɔ ne Zεeb Sεeg. Ye é nyey é nasa náá,
bi di bot aabela mevú me nye nakék ε. Ye é étɛp bi
needi bot be tó eyon ε mekas.

¹³ Tsɛtse nye naapek mena si bhel mebɔwala me
Satan di tó ghooghom ε, étɛp etó ne nena tó eyon ε
mɔn'e nye di ekwyl ɔ.

¹⁴ Ye é dum ne mɔn'e tak ε, nye napek mena tó
ɛbiyo, ye é kɔ esu ε le ε mesyem mena napelaa.

*Mεdjeeb me εdje duu ne Klisto, nyey mot di Gheɲ
bhɔwak djas ɔ*

¹⁵ Klisto é mbanja-mbanja ε Zεeb,
mot di ààbeaa ε.
Nye é mɔn'e meɲɔwak,
nye boo-mot ne esa djas nakusaa ε.

¹⁶ Ye é ne ne ε Zεeb nakus esa djas:
esa ee di pɛ tó gwoo ne yii di kɔ eko ε bɔs ε,
esa ee di ebeaa ne mis ne esa di ààbeaa ne mis ε,
esisim ne ekukuma esisim,
be mekoozi me esisim ne be mebɔwala.
Ye é ne Klisto ε, esonok djas nakusaa, ye nakusaa ε,
kɔ esu ε le.

¹⁷ Esok ne esonok djas ne kusel,
nye nadi é nye moo tak.

Ye é kɔ esu ε le ε,
esa e bhɔwak djas di eke enyɔɔpe.

¹⁸ Ye é nyey ε di eedjeed zεega ndjaa mendjaala dáa
lo mot di edjeed nyel ε.

Ye é nye é di esuk ε tsik.

Nye é mot meken Zeeb nalel egomal pak bot ε
nazegwyε, έtep nye neekak kə esonok djas.

¹⁹ Zeeb nabe é nye eemyam ne tsetse náá,
mebwala me djas di tə mən'ε.

²⁰ Ye é dum ne ne ε Zeeb namyaal εbulal kwyel'ε tə
esonok djas.

Ye é kə esu ε ghiya mən'ε nasee kə melaaba ε,
nye nadjε egwyem έtep bhwak djas,
ye nakoozodi kə εko ε bəs neghu pe tə gwoo.

²¹ Eghen sok, biyo pe nadi é etsetape ne Zeeb, bi
nadi é bot ε mebhuka me kə esu εbiyo bi nadi egek
εsa ε, ne yii bi nasa ε.

²² Tin, nenak Zeeb eesa náá, εgwakel bula pak
biyo ne ne. Ye é kə esu ε esyee ε mən'ε, mot naka
nyel'ε buwa etεε náá, bi needi bot ε dεε é mis Zeeb,
bot ε di àabe ne ndje, àakobe-beak ne eton ε wat.

²³ Tin, bi é goka ne edi tə edum ε kon ne Zeeb,
edum ε kon ne Zeeb di náá, ye pyet ε kə epap na lyel-
lyel ε. Deenek, sa mot àabet náá, bi di etsetape ne
εbwaalel ε len ee bi nabela tə εgwak Mbεε Bhaadal
ε. Ye é sa nagoolaa kə εko ε bəs djas ε. Ye é kə esu ε
tak ε mam Pəl me moo mos mot-mesa ε Zeeb.

*Pəl εpesa mesa étep enem e bot ε zεega ndjaa
mendjaala*

²⁴ Me moo nenak é ne memyaala étep mezuk me
me zεuk étep'en ε. Dáa Klisto nazuk ε, nyel'am pe
é tə mezuk étep zεega ndjaa mendjaala. Ye kwyel
εεε é náá, me eemyaal εzuk kə esu ε nyel ε Klisto.
Me zuk deenek, ye é étep ekel yam bim mezuk kə
mezuk me.

²⁵ Mε moo mos é mot-mesa με zεεga ndjaa mend-jaala. Zεeb nalwom με ε étep egoola μεpka με εnyæpe.

²⁶ Mεpka με tak é, μεpka με nye naloosyel ebhokak ne bot ε bhwak djas ε. Nenak, nye eelyaal ye ne bot ε zedum kon ne Zεeb o.

²⁷ Eτεε náá, Zεeb nadi ekwyel náá, be gu mbεε sa nadi syela ε, esa ee nakobelaa étep bot ε mbyak'ε ε. Beeka sa so tak e: Klisto é to len, nye epedje bin ebwaalel náá, bi é waabela yebε eκεε to duma ε Zεeb.

²⁸ Tin, bis epegoola Mbεε Bhaadal ε Klisto ne bot djas. Bis epedul melo ne elyo mot ne mot ne etson djas, étep mot ne mot neewoozal to tsik Sisim, to egwakel be ne Klisto.

²⁹ Ye é etep tak ε, με di esa mesa με na lyel-lyel. Mε epewa zii ne ghwyil ε Klisto di esa mesa to lam ne mebwala με djas.

2

¹ Mε kwyel ε bi gu tuub με di eduu ko εsu ε len ε, étep ekeletye ghaada Laodhise zenoo bedhiiti ekeletye di àagu με o.

² Mε epelyel bham étep edje bin meghaaz, étep bi neekwyela pak'en ne lyem wat. Mε baakwyel pe ε, bi gu εnyæpe esa nadi syela ee Zεeb tel mena ko εsu ε Klisto ε, étep bi needi bekum ε bot ko εsu ε tak.

³ Mεvu με etson djas, ne yii egu ε etep e syeela é to le.

⁴ Mε lee bin etep bak ε, ekaab náá, bot eζεεεkεop bin ne elen etsal.

⁵ Ye nakoozodi náá, με é etsetæpe ne nen to epuud, tin, με é e ngwoob'en to Sisim. Mε é ne

memyaala dāa mε di ebee bin tō egwakel enyɔpe nε dāa bi di epyet tō edum ε kon nε Klisto ε.

Klisto é mot di edjε tsik ɔ

⁶ Deenek, dāa di náá, bi eezemyaal Yezu Klisto dāa Ghεη ε, kεka tō egwakel nε nε.

⁷ Pyetka tō lε dāa ekanal e le di epyet tō bɔs ε, da bi ε dil tsik'en djas kɔ lε. Dika ghin tō edum ε kon nε Zεeb, dāa bε nalyo bin ε, da bi é gheebubulal bhɔɔ nε Zεeb.

⁸ Bi ekobaka, sa mot àākɔp bin nε elεη e etsal, etson e bot ε bɔs ààval dhiiti sonok. Ye é elεη etsal di ebela εsuk tō etεp e bot ε bɔs ε, tō embee sisim di edhek bot ε bɔs ε. Yε ààbela εsuk tō ghwyil ε Klisto.

⁹ Etεε náá, sa djas di tō Zεeb ε, yε eezebe di tō nyel ε Klisto. Ye é «tɔɔɔ» tō lε.

¹⁰ Ye é nε nε ε, bi nabela esa djas. Nyεy é mot di ekɔk kɔ ekukuma djas nε bεmεbwala djas ɔ.

¹¹ Dāa bi moo tō egwakel nε Klisto ε, Zεeb eewa geka tō len. Geka tak é eni ε beka, ye tok beka epuud bot ε bɔs di esa ε. Tin, ye é beka di edus pε dāa Klisto ε, étεp epεk mena tō nyel epuud e syem ee bot di nε yε'aak.

¹² Etεε náá, é ghεη bi naduwa Zεeb ε, bi nabe é bi eedelaa sama nε Klisto. Tin, biyɔ pe, bi naabaagom sama nε nε, etεε náá, bi naadum kon nε mεbwala mε Zεeb, mot nagomal Klisto pak bot ε nazegwyε ɔ.

¹³ Eghεη sok, bi nadi é bi naazegwyε εsyee ε sisim kɔ esu mesyem men, etεε náá, bi nabe é ààniigelaa beka di edus pε daa Zεeb ε. Tin, Zεeb eedjε bin tsik sama nε Klisto, nyε eepel mesyem menaka djas.

¹⁴ Etεε náá, nyε naazenyaa mεkana mε nakwyalaa étεp ekwyesal mena ndjε sɔs ε. Mεkana

mε tak nabε é ààbε nε tεtε egwakel nε nena kō εsu ε metiη nawaa tō tak ε. Zεεb naazewaaz ye, é bema bε nabem Yezu nε ye é melaaba ε.

¹⁵ Eghεη Yezu nagwyε kō melaaba ε, ye nabε é, nyε naadis ghwyil mεbwala mε nadi pε tō embee esisim nε ekukuma bōō ε. Deenek, Zεεb naadhusal bε é mis mε bot, étεp εswobela eghεη mōn'ε.

¹⁶ E di'enek, sa bi ààbet náá, mot pée bin kō εsu ε edee e dek, nεghu mεnyok mε bi di edε ε. Sa bε ààkopée bin péeak kō εsu ε mεbyon; mεbyon mε ngōn na bes, nεghu mεbyon mε dwoo sabha.

¹⁷ Etsi binek djas lyaal ε, esa ee aaboosael ε. E dwoo pan mos, etεp e tsεetse tak nyen é tō Klisto.

¹⁸ Sa bi aabet náá, bot ε mεdhyaaaz pε εko bhimis pε si di eduwal efofop o sa náá, bi su efute bi di egoka nε εbela ε. Bε nε dyeebaghεε mεnyel dum nε etεp bε di ebee tō mεdhyam ε. Mbi bot binok nε bin mεnyel mōō é toto, etεε náá, ye é esiiza bot ε bōs.

¹⁹ Bε tokape sama nε Klisto mot di kukuma yōbō o. Ye é nyey é di dāa lo, bot ε di dum kon nε nε o kadi é dāa epuud nε metii mε nyel'ε. E di'enek, bōō djas é ebomela é di wat é wyee dāa Zεεb di ekwyel ε.

²⁰ Bi naazegwyε sama nε Klisto étεp bi needi pεka si ghwyil embee esisim di kō εko ε bōs ε. Deenek, «haa» étεp yé bi di dāa bot é di si bhel esa bōs'ak? Bi epemyaal náá, bot besal bin náá, bi myaal mbi metiη mak:

²¹ «Sa waade yak mbi sonok», «Sa waabowal yak mbi sonok», nεghu «Ààmεt-mεtak!»

²² Esonok binek djas waapulel bhis bε aabe ye ε! Yenek djas é, metiη nε melyo mε bot ε bōs di ekus ε.

²³ Ye é tsεetse náá, metiη menek εpenōηel nε

melyo me etson, etee náá, ye é mesa me etsi bebhaab, edi é to mesila, da gel menyel moó étep eduwal e Zeeb. Tin, metin me tak àalu be náá, be kat embee mekwosak moó.

3

¹ Bi naazegom sama ne Klisto pak bot e nazegwyε. E di'enek, saaka esa ee di pe to gwoo ε, pe kyee Klisto di ndiidel pe mbo eghen e Zeeb ε.

² Waka esimza bin to esa ee di pe to gwoo ε, àabe to esa di ko εko ε bos ε.

³ Etee náá, bi eezegwyε. Tin, tsik'en e syela e membo me Klisto, pe daa Zeeb.

⁴ Tete tsik'en é Klisto. Eghen Klisto aatuula ε, biyo pe é waatuula sama ne ne étep edi to duma ye.

Tsik na mwa ne tsik na bes

⁵ Saka náá, esa ee di edje bin gwyε esa ekwosak epuud ε, gwyε. Esa é tak é: mezo, esa di edje edhuud ε, ekaa, embee mekwosak, doob mevυ. Etee náá, doob mevυ é dhatyee eduwal e benaghisε.

⁶ Mbi mefulu menek é di esa náá, Zeeb kpaa ebuk ne bot ε di àalooba ne ne ε*.

⁷ Beeka dáa bi nadi ekε, é sok tsik'en nadi ye dinaa si bhel mesyem menek ε.

⁸ Nenak, bi goka é, bi kat etep bak: ebuk, ekpaa e lyem, mbee lyem. Sa mbee ekpa e wat, neghu melee àawyis to enuub ben.

⁹ Sa bi àadi ne elen etsal pak'en, katka mefulu men e na mwa, ne eseseε bi nasesa sok ε.

¹⁰ Ye kabe biyo ε, bi moo é ne mefulu me na bes, bi moo é bot ε na bes e Zeeb Mekus-bot yenaka. Nyey é

* **3:6** ne bot ε di àalooba ne ne ε be dhiiti ekwyla tok ne mekpa mak.

di esa ngwyis náá, bi nɔ̃ɛl nɛ nɛ, éɛp bi neegu nyɛ ɛnyɔɛpɛ.

¹¹ Ye tokapɛ nɛ mbɛk pak bot ɛ mbyak eYuda, nɛ bot ɛ di ààbɛ bot ɛ mbyak eYuda ɔ, pak mot zenì beka, nɛ mot di ààni beka ɔ. Ye tokapɛ nɛ ndjon, ààbɛ nɛ mot di ààgu mɛkana ɔ, ààbɛ nɛ kwom, nɛghu mot di pɛka ɔ. Tin, sa di nɛ metan ɛbuɛpɛ ɛ, ye é Klisto, nyɛy é di djas tɔ éɛp'enaka.

¹² Bi moo é bɔn ɛ Zɛɛb, nyɛ naazesée bin nɛ ɛkwyɛl ɛ bin. Ye é éɛp tak ɛ di náá, bi goka é di nɛ mɛsila, nɛ lyem ghon, nɛ enɛm esa, nɛ metela zɛnɔɔ ɛmaad ɛ lyem.

¹³ Djisalelka pak'en, da bi é baapelel pak'en. Ye é bɛ náá, mot ngɔt ɛ nɛ ndjɛ nɛ mɔn sɔ mot ɔ, dáa Ghɛɲ napel bin ɛ, nyɛy pɛ goka é nɛ ɛpel mɔn sɔ.

¹⁴ Dan-dan é náá, kwyelelka pak'en, etɛɛ náá, kwyɛl é di esa náá, bi di tɔ ɛgwakel ɛnyɔɛpɛ.

¹⁵ Beta náá, egwyem ɛ Klisto djɛɛd ebhum elyem bin. Etɛɛ náá, ye é kɔ ɛsu ɛ egwyem binek ɛ Zɛɛb nadjoo bin éɛp bi needi ekyes e nyel wat. Deenek, bulalka nyɛ bhɔɔ é mɛwala djas.

¹⁶ Beta náá, mɛkpa ɛ Klisto nɛ mɛvu mɛ tak djas di tɔ len. Lyoelka pak'en, dulelka mɛlɔ pak'en nɛ etson djas. Tiika membi mɛ mɛdjeeb mɛ Zɛɛb djas nɛ lyem wat, nɛ ɛbulal ɛ bhɔɔ tɔ mɛdjeeb mɛ di edjɛ duu nɛ Zɛɛb ɛ, zɛnɔɔ mɛdjeeb mɛ Sisim na Dɛɛ di etel ɛ.

¹⁷ Mɛsa mɛ bi aadi esa djas ɛ, nɛ mɛpka aadi ewyis tɔ enuub'en ɛ, saka yɛ nɛ din ɛ Ghɛɲ Yezu tɔ ɛbulal ɛ bhɔɔ nɛ Zɛɛb Sɛɛg kɔ ɛsu ɛ lɛ.

Dáa ekeletyɛ di egoka nɛ ɛgyee sama ɛ

¹⁸ Biyɔ boa, loobaka nɛ botom bin, dáa di egoka náá, ye sael é mis mɛ Ghɛɲ ɛ.

19 Ye kabε biyɔ botom ɔ, kwyelka bel bin, sa bi ààlyel elyem ne nɔɔ.

20 Bɔn, loobaka ne bebyael bin, etεε náá, ye é sa Gheη di emyaala ne ye ε.

21 Biyɔ be seeg ε bɔn, sa bi ààsa náá, bɔn bin kpaa lyem, é kaab náá, esimza bɔɔ ezεkepulel.

22 Ekwom, loobaka ne etεp djas ekukuma bin di kɔ εko ε bɔs aalεε bin ε. Ye ààgoka náá, εlooba ε len ne nɔɔ zodi é sok be di tin mendiidel egwyak bin, étεp be neemyaala ne nen. Tin, loobaka ne nɔɔ ne lyem seη, kɔ εsu ε eduwal ε bi di eduwal Gheη ε.

23 Ye nakoozodi mesa men djas bi di esa ε, saka ye ne lyem wat dáa bot ε di esa mesa ε Gheη ε, ààbe ne menyaad dáa bot ε di esa mesa me bot ε.

24 Guka náá, Gheη é waadje bin efute, bi é waa-bela ekum ee nye nakwom étεp bot be ε. Etεε náá, tεtε kukuma ee bi di esa mesa me ɔ, ye é Gheη Klisto.

25 Tin, mot di sa εbiyo ɔ, nye aabela efute e mesa me, etεε náá, Zεεb ààwa mbεk pak bot.

4

1 Biyɔ ekukuma, beka ekwom bin enyɔεpe tɔ epiki ààbe ne mekɔη. Ne tseεtse guka náá, bí é pe ε ne kukuma pe tɔ gwoo.

Mεlyo me mesik

2 Djaalaka Zεεb tɔ esosoob. E sok bi di edjaala Zεεb ε, dika ndjem da bi é εbulal nye bhɔɔ.

3 E sok bi di edjaala Zεεb ε, bi goka é ne εbaadjaala pe étεp'es, etεε náá Zεεb needje bis tεtε ze εgoola Mbεε Bhaadal ye. Mbεε Bhaadal tak nabe é, εgoola etεp e Klisto di syela ε. Deenek, dum ne tεp tak ε me di nenak é membok'ak.

⁴ Djaalaka ne Zeeb etee náá, me neegoola bhaadal tak popoopwon dáa me di egoka náá, me sa e.

⁵ Keka ne etson djas é mis me bot é di ààdum kon ne Klisto o. Bi é di ne ghwyil esa be enem esa o, saka ye.

⁶ Betka náá, mepka di ewyis to enuub bin e, ye di mbée mekpa ne metela djas ne megwom dáa meson, étep bi neegu dáa bi di egoka ne eyala mot ne mot e.

Meswosel me mesik

⁷ Tisik, mot mena ne be noo di egyee o, sosoob mon e nyee'ena yenok to mesa e Ghen, nye waadjé bin menduk mam djas.

⁸ Me dhis nye e étep nye eezedje bin menduk mes, ne ebaadje bin meghaaz.

⁹ Nye epezye sama be ne Oneezim, sosoob mon e nyee'ena to edum ekon ne Zeeb, nye é ngot to bon nyee'g bena, nye waalee bin etep djas di edhaa wak e.

¹⁰ Aalistaalak mot bis ne ne di é membok o, be ne Malak mon e nyee'g e Bhaalnabhas, be eeswos bin. Bi naazegwak metin me bis nadjé bin dum ne Malak e, nye kum penek o, beka nye enyope.

¹¹ Yezu mot di ebaadjóaa Yustus o, nye eeswos bin. Bot binok belé e, ba bim ekeletye bot e mbyak eYuda di esa mesa me eyon e Zeeb bis ne be noo e. Deenek, be é naadyeebadje me meghaaz.

¹² Epafalas, mon e nyee'g'en mot nadus pe kyee dik'en o, nye eeswos bin pe. Nye é kwom e Yezu Klisto, nye àakat edjaala Zeeb ko esu e len. Etee náá, bi neepyet enyope étep edum e kon e len ne Zeeb neeto sok, deenek, bi neegheesesa ekwosak e Zeeb.

¹³ Με έ νε ghwyil εke kω esu ε λε nάά, nye επedyeebasa mesa ebuepe kω esu ε len, kω esu ε ekeletye e ghaada Laodhise, νε ekeletye ghaada Yeelapolis.

¹⁴ Luk mon ε nyεeg'ena mot di dhokotolo o, be νε Dhemas eeswos bin.

¹⁵ Swoska bon nyεeg bina di pe to ghaada Laodhise o, doo νε Nymfa zenoo bot ε zεega mendjaala di esεega pe to ndjan'ε o.

¹⁶ Bhis bi aasilal elaa mekana mak ε, kyeedka ye pe daa bot ε di pe ghaada Laodhise ε. Saka deenek, etep ye neelanaa to zεega ndjaa mendjaala moo, da bi ε laa mekana me me nadhis pe yobo ε.

¹⁷ Leeke νε Alsipe nάά: «Woo ε kobaka! Woo goka ε νε esilal enyoepe mesa me Gheη nadjε woo ε.»

¹⁸ Ye ε mam Pol me emet ekwyal mekpa me meswosel mak νε mbo'am met. Sa bi aadjisa nάά, me ε ε membok. Beta nάά, enem νε embεε e Zεeb di νε nen.

Bekwel

Bekwel: Bekwel (New Testament)

copyright © 2024 Wycliffe Bible Translators, Inc.

Language: Bekwel

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

- You include the above copyright and source information.

- If you make any changes to the text, you must indicate that you did so in a way that makes it clear that the original licensor is not necessarily endorsing your changes.

- If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-04-26

PDF generated using Haiola and XeLaTeX on 26 Apr 2025 from source files dated 26 Apr 2025

93bbeee1-b255-555f-8c39-01878a3cad57